



UKA 2017/136

17/10-2017

Nivi Olsen

Siunnersuut uunga: Kalaallit napparsimasut danmark-imi katsorsartittarnerannut atatillugu ilaquataasup/t ineqartinneqartarnerannut atatillugu, katsorsarneqartussaq rigshospital-imi napparsimmavimmiluunniit allami suliarineqassatillugu ilaquataasup/t unnuiffigisinnaasaannik pilersitsisinnaanerata iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasqaatitariumaagai, soorlu aningaasartuutissat aammalu sulisussanut tunngasut pillugit Naalakkersuisut peqquneqassasut inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)
(Siullermeerneqarnera)

Artornartuuvoq perululluni. Nunamilu maani nalunngisattitut nappaateqarpoq nammineq katsorsarsinnaanngisatsinnik, taamaattumik napparsimasorpassuit Danmarkiliartittariaqartarpagut katsorsartinniassammata.

Taakkulu napparsimasut sianissusaat innarlerumanagu pingaaruteqarpoq toqqissisimanissaat aamma sapinngisamik qanigisaminnik ilaqarsinnaanissaat.

Pissutsit maannakkutut ikkallartillugit nalunngilarput Kalaallit napparsimasut Angerlarsimaffianni piffissap ilaani inissat amingartartut aamma malunnarpoq tamanna allanngorallarnaviangitsoq iluoommat inuunertusiartortugut, tamatumalu kinguneranik aamma naatsorsuutigisariaqaripput perulullutik Danmarkimi katsorsartikkiartortartussat aamma amerliumaartut.

Taamaattumik isumassarsiatsialaavoq ilaquataasut Danmarkimi unnuiffigisinnaasaannik pilersitsinissamut atatillugu pitsaaqutaasut akorngutillu misissorneqassappata. Misissuinermut atatillugu Demokraatinut pingaaruteqarpoq, aningaasatigut kingunerusussat misissorluarneqarnissaat, paasiniassagatsigu unnuineq ilaquataasunut inuiaqatigiinnullu qanoq akeqassanersoq. Aamma misissuineq innersuussutitaqartariaqarpoq, inissiiivissaq sumiissanersoq aamma pitsaanerussanersoq unnuisarfik attartorneqartuuppat imaluunniit pigineqartuuppat.

Taamatut oqaaseqarluta siunnersuut Ilaqutariinnermut Peqqissutsimullu Ataatsimiititaliamut innersuupparput.